

## BIJLAGE.

Brief van den rector der Universiteit te Leuven aan den magistraat van Utrecht:

Viri magnifici spectabiles et circumspecti orthodoxae fidei professores universi ecclesiastica et apostolica tenentur revereri mandata; alacrius tamen hii, qui etiam sub temporali ecclesiae jure militant et dominantur ceterorum; miramur igitur vehementer, quod in ecclesiastica urbe non accuratior ad ecclesiae fulmina sit reverentia quam ut concivis et incola Johannes quidam de Amstel excommunicatus, aggravatus, reaggravatus ac fortius ex abundanti reaggravatus, sanctae matris monita contempnens, sustineatur ceteris, ut merito suspicamur, communicans, qui tanto tempore mente induruit ut mox Christianum se vix meminerit, nec heresis careat suspicione, ac in sordibus amplius insordescat adhuc, ita ut quanto plures sui contagio commaculet se minus arbitretur infectum. Ubi enim omnes fetent, unius fetor non sentitur. Si igitur minus forte in aliquo hujus facti scientia ad vestras pervenerit circumspectiones, quod de illis pie malum quam secus credere, libenter easdem hiis nostris introclusis auctenticatis copiis desuper reddimus certiores, maximum in modum vice communis matris ecclesiae hortantes, ut, quoniam necesse est vulnera ferro abscindere quae fomentorum non senciunt medicinam, conservatoris nostri, immo verius apostolicae sedis, a cujus calore non est qui se abscondat in hac parte, gerentes morem mandatis, quae ceteris forte contrariis etiam vestrae rei publicae, ut nonnulli asserunt, concessis derogare dinoscuntur, ad brachii secularis executionem prompte se accingere velint, atque suum convicem compedibus et manicis ferreis, si opus sit, emendatum suae matri ecclesiae restituere ut, sic hominem lucrati deo satisfaciant,

vestrae circumspectiones, atque etiam nos relevent a molestia qua nostro consorti in rebelles et inobedientes assistentiam debitam non possemus denegare, pro ut intelligere non ambigimus easdem circumspectiones, quibus usui esse cupimus oportune, illasque justitiam diligentes omni tempore fore felices.

Scriptum Lovanii  
die XVIII mensi Maji  
anno 1495.

Rector Universitatis  
generalis studii Lovaniensis.

---